

'Jambatan baru mungkin 30 tahun lagi'

SINGAPURA: "Projek untuk menggantikan Tambak Johor menghubungkan Singapura dan Malaysia dengan sebuah jambatan baru mungkin sudah dibatalkan, tetapi akan ada jambatan lain perlu dibina pada masa depan," kata Menteri Kanan republik itu, Goh Chok Tong.

"Mungkin 20 hingga 30 tahun akan datang, kita fikirkan mengenai pembinaan sebuah jambatan menghubungkan Singapura ke Pulau Tekong dan ke Pantai Timur Malaysia.

"Tiga puluh tahun akan datang, saya fikir ada pembangunan di sepanjang Pantai Timur yang memerlukan pembinaan sebuah jambatan" katanya dalam satu laporan *Channel NewsAsia*.

Goh berkata demikian sebagai mengulas kenyataan Perdana Menteri Malaysia, Datuk Seri Abdullah Ahmad Badawi baru-baru ini mengenai hubungan kedua-dua negara.

Bercakap kepada pemberita di Helsinki, Finland Isnin lalu, Abdullah berkata, hubungan antara Malaysia dan Singapura tidak harus terjejas dengan keputusan membatalkan projek pembinaan jambatan menggantikan Tambak Johor itu.

Goh percaya jambatan baru pada masa depan boleh merangsangkan pertumbuhan sepanjang pantai timur Johor.

Beliau turut menyentuh keperluan bagi Singapura dan Malaysia untuk mencari jalan mengintegrasikan ekonomi kedua-dua negara, dan berkata, kedua-dua negara akan dapat memperoleh manfaat menerusi kerjasama itu.

"Sudah tentu saya galakkan Abdullah untuk bekerjasama dengan Lee Hsien Loong, yang masih baru memegang jawatan Perdana Menteri Singapura, untuk memandangkan ke depan dan bukannya melihat ke belakang," katanya. - Bernama